

Agricoltura ier ed oz

«Cuntrasts» da la Televisiun Rumantscha sin DVD, part 4

«In prà senza flurs è sco in vitg senza uffants»

Che la cuntrada è noss chapital – da quest'opiniun èn tuts. Ma areguard la dumonda co nizzegiar quest chapital, là van las ideas ina ord l'otra. Il pur vul producir cun la cuntrada. Quel che protegia la cuntrada vules ch'i capitia uschè pauc sco pussaivel cun quella. Quel che fa in parc vules er cumandar tge far cun la cuntrada. In exempel furman las discussiuns en il Surses nua ch'i va per dir gea ni na al parc Ela. Il film «In prà senza flurs è sco in vitg senza uffants» dat in insatg davart l'avegnir da nosssa cuntrada. (Emissiun dals 29 da matg 2011, redacziun: Petra Giger).

Segar – gizzar – batter, in omagi a la fautsch

La crutscha, la vaira ed il schalun. Tgi ch'enconuscha quests plets enconuscha la fautsch. Il film davart la fautsch è in film davart in guaffin ch'è sin via da svanir dals funs grischuns. Anc viva la generaziun ch'ha segà e vis a segar tut a maun. Johann Caminada da Vrïn, Cristoffel à Porta da Scuol ed



Ottilia Schlegel da Boscha san co ch'ins sega lev e bain, co ch'ins gizza e batta e co ch'ins schaluna la fautsch. Gaetano Brunelli preschenta la pli pitschna e la pli gronda fautsch ed ils differents schaluns che vegnan duvrads en Svizra. Il film davart la fautsch è in omagi ad in guaffin ch'era ina giada indispensabel ed oz prest museal. (Emissiun dals 21 da settember 2008, redacziun: Bertilla Giossi).

Mes clavà

«Quei ei miu prau, quei miu clavau, quei miu regress e dretg. Sai a negin per quei d'engrau, sun cheu jeu mez il retg.» Uschia descriva Gion Antoni Huonder il clavà en sia poesia: Il pur suveran. Gea, il pur da lez temp era losch da ses clavà. Ed oz? Per ils blets da nus èn els er anc oz patria, per auters simplamain in bajetg da niz. In bajetg ch'ins dovra, ch'ins lascha scudar u ch'ins spazza. Cun mintgin svanescha identitad, cultura e tradiziun. (Emissiun dals 25 da settember 2011, redacziun: Gion Tschuor).

Pur forever –

Carl Jenal, il pli vegl pur svizzer

Carl Jenal è il pli vegl pur activ en Svizra. Il pur da Zernez survegn quest onn 98 onns ed ha trais vatgas en stalla. El fa oramai il pur dapi 33 onns sco un pensiunà, senza subvenziuns. Carl Jenal è in'enciclopedia dal svilup puril durant l'ultim tschientaner. Bler è sa midà en quest temp sin il funs ed en stalla. L'autura da films Susanna Fanzun al ha accompagnà durant las quatter stagiuns da l'onn. Carl Jenal ha chattà la fortuna en sia vita simpla ed ans lascha participar a quella. (Emissiun dals 5 da favrer 2012, redacziun: Susanna Fanzun).

Puscha, puscha tut che cloma. Istorgias da la vatga brina

L'onn 2000 ha l'autur Gieri Venzin detgà in da ses numerus films documentars a la vatga da las vatgas, la brina! La vatga preferida en il Grischun, anzi en l'entira Svizra e sur ses cunfins or. La vatga brina accumplecha fidaivlamain tut sias obligaziuns. Ella dat nà per nus latg e charn, pel ed ossa, e quai dapi 100 onns. Ma la vatga brina ha fatg atras in svilup enorm e cun ella er il puresser. Buna puscha, chara puscha, ma er povra puscha! («Sas anc?», emissiun dals 5 da fanadur 2015; redacziun: Gieri Venzin).



In mund cun in ritums tut agen: l'agricultura en il territori alpin.

FOTO: PD

«Up in the sky» – 3 uffants ad alp

La vita ad alp è ina vita sco en in auter mund, in mund pli datiers dal tschiel. Braida (8), Marchet (6) e Jon (3) passentan cun lur geniturs Anna Mathis e Riccardo Nesa la stad sin l'alp Gün en Stussavgia. Là vivan els cun lur gidantra Aita, cun 48 vatgas, 10 portgs, 5 giaglinas, il chaun e millieras mustgas. Ils uffants cusseglissan a tuts dad ir ad alp. Ils geniturs han blera lavur e n'han betg adina temp per ils uffants. Tge fan ils uffants, cur ch'igl è lungurus? L'autura Susanna Fanzun ha accompagnà Braida, Marchet e Jon durant la stad 2012 e mussa lur mintgadi sin l'alp Gün. En il film è il pitschen mund da l'alp l'entir mund. (Emissiun dals 2 da zercladur 2013, redacziun: Susanna Fanzun; er cumpari en vendita).

In avemaria per l'alp

Stad, ad alp, i fa notg. Tras in dratguir per latg cloman ils signuns «l'avemaria». Mintga di, da mintg'aura. Els rogan Dieu ed ils sontgs da preservar l'alp da disgrazias. Ed els rogan dad aut, perquai che la protecciun vala uschè lunsch sco quai ch'ins auda lur usch. La benedicziun da l'alp vala sco la pli veglia furma da la musica populara ch'è

anc adina viva. Ella na vegn betg chantada per plaschair dals turists, mabain or da profunda persvasiun interna. Il pli fitg viva il ritual anc en la Svizra Centrala ed en l'Alpstein en la Svizra Orientala. En la Svizra rumantscha è l'usit cunzunt anc deraà en la Surselva catolica. Ma l'usit è sin murir or. (Emissiun dals 29 d'avrigl 2012, redacziun: Bruno Moll).

«Buob, quescha!»

La sort dals pasters pitschens pli baud ad alp

Onns en ed onns ora han las alps dà paun e gudogn, er ad uffants – a matatschs. Tschients e tschients gievan stad per stad ad alp, quai cunzunt uschè ditg che la scola cuzzava be in mez onn. La litteratura e la chanzun rumantscha glorifitgeschan e dechantan bunamain tras e tras il mintgadi alpester. Pled e tun survegnan mo quels ch'han gartegià bain. Per cletg è quai stà la gronda part. Igl ha dentant er dà auters, da quels ch'han suffri e pati, ed il dumber da quels è blier pli grond che quai ch'è enconuscent. Il film va a la tschertga d'istorgias alpestras ch'han da far pauc cun la chanzun rumantscha. (Emissiun dals 20 da settember 2009, redacziun: Gion Tschuor).

La stgargiada da Breil

Igl è in spectacul. La stgargiada a l'urdal vitg da Breil carmala mintg'onn dapli public. Suententer la stad ad alp vegnan radund 700 arments da tschintg alps beneventads a chasa. Surtut las vatgas decoradas cun plum-pas e tschupels stattan in il center. Otmar Seiler mussa co che la stgargiada da Breil è daventada in di da festa. El ha dentant er filmà durant la stad e dat in sguard enavos sin ils trais mais ad alp. (Emissiun dals 15 da settember 2013, redacziun: Otmar Seiler).

La Tundeida

Tunder nursas è ina lavur che vegn fatga senza avair aspectaturs ed aspectaturas. A Savognin è quai auter, qua vegn tundi amez il vitg, visibel per in e scadin. Dapi 10 onns datti «la Tundeida», ina fiera ed ina festa da la launa-nursa. I vegn tundi a maun e cun maschina, i vegn filà ed i vegn vendi da tutas sorts products da launa, perfin savun. La fiera è daventada in lieu da sentupada apprezia dals Surmirans e dals giasts da la regiun. Per ils Cuntrasts va Otmar Seiler a la fiera e l'emprim ch'interresscha el èn ils chauns pastur che mussan lur inschign. (Emissiun dals 12 d'october 2013, redacziun: Otmar Seiler).

La liongia – ina spezialitad en trais variantes

Ils Cuntrasts han visità 3 mazlers – tuts trais fan lur liongias tenor agens recepts. A Scuol vegni fatg la liongia engiadinaisa, a Savognin las liongias da brassar da vadè ed a Cumpadials la «ligiongia nera». (Emissiun dals 21 da december 2008, redacziun: Arnold Rauch).

«Forza chaval»

La lavur para be in relict or d'in auter tschientaner. Ina lavur silenziosa e tuttina energica. Ils chavals paran dad esser vegnids directamain or d'in auter mund. Cun ina forza immensa e tuttina cun gronda calma. Arnold Rauch ha accompagnà en l'Engiadina Bassa ina da las davosas gruppas da lavurers da guaud che «runan laina» cun agid da lur chavals. Ils chavals vegnan da la Frantscha u dal Tirol. Però lur patruns, ils viturins, èn Engiadinais tras e tras. Ensemen prestan els ina lavur impurtanta ed indispensabla per ils guauds da l'Engiadina, ina lavur che vegn però concurrenzada adina pli savens da maschinas ed helicopters. Il film «Forza chaval» va en tschertga dal puls da questa lavur simbiotica tranter chaval ed uman. E quai che l'autur chatta amez ils guauds da l'Engiadina, è in ritum da lavur e da vita che l'uman d'ozendi para da perder ed emblidar. Ma i dat anc speranza, grazia a la «Forza chaval». (Emissiun dals 29 da mars 2015, redacziun: Arnold Rauch).

Per amur da l'avieul

Il film documentar «Per amur da l'avieul» n'è betg in film davart la mort globala dals avieuls. Flurina Badel focussescha in'otra realitad precis uschè existenta: Il mintgadi d'apiculturs pitschens. Malgrà che er lur avieuls èn infectads da la varroa e periclitads da mal-sognas, tgiran ils apiculturs lur avieuls durant uras cun blera perseveranza, premura e gronda responsabladad. Il film è in omagi a quels pitschens apiculturs ed a quellas pitschnas apiculturas che na s'engaschan betg or da motivs commercialis mabain or da raschuns idealas. Per quest film è l'autura viaggiada en l'Engiadina ed a New York, perquai ch'en la muntogna datti anc els, ils apiculturs fortunads, ed en la citad ils avieuls fortunads. (Emissiun dals 21 d'avrigl 2013, redacziun: Flurina Badel).

Dal veterinari a la veterinaria

Veterinari – ina clamada che pretenda grond engaschi e flexibladad, lungs viadis, lavur da notg, da tutt'aura e cun pichet sur la fin d'emna. Dapi onns sa decidan quasi mo dunnas per questa clamada, ils umens mancan. Eligi Derungs ha accompagnà dus veterinaris durant lur lavur da mintgadi. Quai cun la veterinaria Marianne Caviezel-Ring ch'è mamma d'in matatsch e viva a Strada. Ensemen cun ina collega veterinaria maina ella dapi tschintg onns ina pratica a Scuol. Vitus Gartmann viva a Sevgein ed è bab da dus uffants. Cun collegas maina el dapi in onn ina pratica comunabla a Glion. Qua lavuran ovg veterinaris e da quests èn tschintg dunnas. (Emissiun dals 23 da mars 2014, redacziun: Eligi Derungs).



Er la vita d'alp vegn tractada en diversas contribuziuns dals «Cuntrasts».

FOTO: PD

La preschentaaziun:

«Cuntrasts» da la Televisiun Rumantscha: Films emess ils onns 2007–2015, accessibels en la Biblioteca chantunala en format DVD.

Dapli infurmaziuns:

chatta.ch/?hiid=4733
www.chattà.ch